

四庫全書

史部

欽定四庫全書

建炎雜記乙集卷十四

宋 李心傳 撰

雜事二

岳少保誣證斷案

岳武穆飛之死王仲元揮麈錄載王俊告變狀甚詳且云
嘗得其全案觀之仲貫父為尚書郎問諸棘寺則云張俊
韓世忠二家爭配饗時俊家具賂取其原案藏之今不存

矣余嘗得當時行遣省劄考其獄詞所坐一時煅煉文致之詞然猶不過如此則飛之寃可見矣今錄於後紹興十一年十二月二十九日刑部大理寺狀准尚書省劄子張俊奏張憲供通為收岳飛處文字後謀反行府已有供到文狀奉聖旨就大理寺置司根勘聞奏今勘到龍神衛四廂都指揮使閬州觀察使高陽關路馬步軍使副都總管御前軍都統制權副都統節制鄂州軍馬張憲僧澤一右朝議大夫直秘閣添差廣南東路安撫司參議官于鵬右

朝散郎添差通判興化軍孫革左武大夫忠州防禦使提
舉醴泉觀岳雲省陰人智決承節郎進奏官王處仁從議
郎新授福州專管巡捉私鹽蔣世雄及勘證得少保武勝
定國軍節度使充萬壽觀使岳飛所犯內岳飛因為探報
得金人侵犯淮南前後十五次乃受親劄令指揮策應措
置戰事而坐觀勝負又逗留不進及因董先張憲問張俊
軍馬如何怎生地言之道都敗了回去也便乃指斥乘輿
問張憲董先道你只將一萬人已跼踏了及因罷兵權後

又令孫革寫書與張憲令措置別作壁畫又令看訖焚之
又令張憲虛申報四太子大兵前來侵犯上流自是之後
張憲商議待反背而據襄陽及把截江岨兩下令虜官私
舟船俟又累次令孫革奏報不實及制勘虛妄等罪除
罪輕及指斥乘輿情理相切害者斬係罪重外法等稱
律有臨軍征討稽期三日者斬其岳飛合依斬刑私罪
上定斷合決重杖處死看詳岳飛坐擁重兵於兩軍未
解之間十五次被受御筆拜遣中使督兵逗留不進及

如此時輒對張憲董先指斥乘輿情理相切害者又說
張憲董先跣踏張俊韓世忠人馬及移書與張憲令措
置別作擘畫致張憲意待謀反據守襄陽等處作過委
是情理深重勅罪人情重法輕奏裁張憲為收岳飛書
令憲別作擘畫因此張憲謀反要提兵占據襄陽投拜
金人因王俊不允順方有無意作過之言並知岳飛指
斥切害不告并依隨岳飛虛申無糧進兵不得及依于
鵬書申岳飛之意令妄申探報不實及制勘虛妄除罪

輕外法等稱律謀叛絞其張憲合於絞刑私罪上定斷
合決重杖處死仍合依例追毀出身以來告勅文字除
名本人犯私罪絞舉官見行取會候到別具施行岳雲
為寫詔目與張憲稱可與得心腹兵官商議擘畫因此
致張憲謀叛除罪輕次等外法等稱勅傳報朝廷機密
事流三千里配千里不以陰論勅刺配比徒三年本罪
徒以上通比滿六年比加役流律五品犯流以下減一
等其岳雲合比加役流私罪斷官減外徒三年追一官

罰銅二十斤入官勒停看詳兵雲因父罷兵權輒敢交
通主兵張憲節次催令得與心腹兵官擘畫因此致張
憲提兵謀叛及傳報朝廷機密惑亂軍心情重奏裁岳
雲犯私罪徒舉官見行取會到候別具施行于鵠為所
犯虛妄并依隨岳飛寫謫目與張憲等妄說岳飛出使
并令張憲妄供探報除罪輕外法等稱勅為從不配律
五品犯流罪減一等于鵠合徒三年私罪官減徒二年半
追一官罰銅十斤入官勒停情重奏裁于鵠犯私罪徒

舉官見行取會候到別具施行孫革為依隨岳飛寫諮
目與張憲稱措置擘畫等語言并節次依隨岳飛申奏
朝廷不實除罪輕外法等稱律奏事不實以違制論徒
二年律共犯罪徒減一等其孫革合徒一年半私罪官
減外徒一年合追見任右朝散郎一官官誥文字當徒
一年勒停情重奏裁孫革犯私罪徒舉官見行會候到
別具施行王處仁為知王貴申奏朝廷張憲背反供仲
岳飛并說與蔣世雄等稱勅傳報漏泄朝廷機密事流

三千里配千里應罪刺配比徒三年本罪徒以上通比
滿六年加徒流官當准徒六年其王處仁各於比加徒
流私罪斷合追見任承節郎并歷任承信郎共兩官官
誥文字當徒三年據案別無官當更罰銅八十斤入官
勒停情重奏裁王處仁犯私罪流舉官見行會問候到
別作施行將世雄為見王處仁說王貴申奏朝廷張憲
待背叛事岳飛處覆除罪輕外法等稱律傳報漏泄朝
廷機密事流三千里從減一等其將世雄合徒三年私

罪斷官減外徒二年半合追從議郎秉義郎兩官官誥
文字當徒二年餘半年更罰銅十斤入官勒停情重奏
裁將世雄犯私罪徒舉官見行會問候到別具施行僧
澤一為制勘虛妄并見張憲等待背叛向張憲言不如
先差兩隊甲馬防守總領運使衙門并欲與張憲詐作
樞密院劄子發兵過江及要模刻樞密院印文除罪輕
外法等稱律謀叛者絞從減一等其僧澤一合流三千
里私罪斷合決脊杖二十本處居住一年役滿日放仍

合下本處照僧人犯私罪流還俗條施行情重奏裁智
浹為承岳雲使令要將書與張憲等拜受岳雲金馬令
智浹將書與張憲等共估錢三百二貫足除罪輕外法
稱律坐贓致罪十疋徒一年十疋加一等罪止徒三年
謂非監臨主司因事受財七品官子孫犯流罪以下聽
贖其智浹合徒三年贓罪贖銅六十斤情重奏裁小貼
子據貼黃稱契勘岳飛次男岳雷係岳飛一處送下今
來照證得岳雷別無干涉罪犯緣由為岳飛故節飲食

成病依律合召家人入侍已就令岳雷入侍看覲候斷
下案內人所有岳雷亦乞一就處分降下又小貼子稱
所有僧澤一合下本處依條施行又小貼子稱契勘數
內于鵬見行湖北轉運司根究銀絹等四百萬合下所
屬照會後根究歸着日即乞依今之所斷指揮施行又
小貼子稱看詳岳飛張憲所犯情重逐人家業并家屬
合取自朝廷指揮拘籍施行看詳岳飛等所犯內岳飛
私罪斬張憲私罪絞并係情理所重王處仁私罪流岳

雲私罪徒並係情理所重將世雄孫革于鵬私罪徒并
係情理稍重無一般例奉聖旨根勘合取旨裁斷有旨
岳飛特賜死張憲岳雲并依軍法施行令楊沂中監斷
仍多差兵將防護餘依斷于鵬孫革將世雄王處仁除
名內于鵬孫革永不收叙于鵬送萬安軍孫革送潯州
王處仁送連州將世雄送梧州並編管僧澤一決脊杖
二十刺面配三千里外州軍牢城小分收管智浹決臂
杖二十送二千里外州軍編管岳飛張憲家屬分送廣

南福建路州軍拘管月具存亡奏聞編管人并岳飛家屬並令楊沂中俞侯其張憲家屬令王貴汪叔詹多差得力人兵防送前去不得一併上路岳飛張憲家業籍沒入官委俞侯汪叔詹逐一抄劄具數尚書省餘依大理寺所申并小貼子內事理施行仍出榜曉諭應緣上件公事之人一切不問亦不許人陳告官司不得受理

建炎雜記乙集卷十四

欽定四庫全書

建炎雜記乙集卷十五

宋 李心傳 撰

官制一

平章軍國事

平章軍國事開禧元年初置以命韓侂冑國朝舊相特命平章軍國事者凡四人天禧初王文正公以首相告老拜太尉兼侍中五日一朝遇軍國大事不以時入參

決公懇辭不拜慶歷初呂文靖公亦以首相求罷拜司空
平章軍國重事公卒辭之元祐初文忠烈公自太師致仕除
平章軍國重事未幾呂正獻公以右揆求去亦除司空同
平章軍國事潞公五日一朝申公兩日一朝非朝日不至
都堂蓋祖宗所以優待元勲重德之意非他相比也王呂
二公所平章重事之目不可得而考潞公所謂重事者則
大典禮大刑政及進退侍從官軍三京尹三路帥臣已上
乃與聞之比申公去重字則政事無所不關第省其常程

細務而已及侂冑將拜平章儀曹蕭景伯討論典禮
乃請三日一朝因至都堂議事大率皆用申公故事而損
益焉其後邊事起又命一日一朝尚書省印亦納於其第宰
相僅比參知政事不復知印矣始時禮官議廣左丞相府
以為侂冑第又議仍給節度使俸侂冑引義控辭有詔褒
納而止蓋侂冑繫銜比申公省同字則其體尤尊比潞公
省重字則其所與者廣此當時討論之本意

參知政事并除三員

參知政事自乾德以來止除二員或一員而已嘉泰三年春謝子蕭初免相許深甫為參知政事既命陳勉之以樞長兼權俄又除袁起崇蓋三員也時朝廷未置相故勉之以員外兼此亦國朝所未有嘉定時又命雷季仲婁彥發婁大防亦三員遂為故事

權提舉編修玉牒

權提舉編修玉牒者自乾道元年錢處和始故事玉牒以首相領之紹興十二年初復玉牒所重其事既以秦

會之提舉十四年五月又命執政程元顓同兼非常制也自後相府闕則以首參兼仍帶權字淳熙十五年五月王丞相去位周益公以右揆兼領時敕令纔罷而首參留仲至無兼局理益公以奏乞以仲至權提舉玉牒許之宰相在位而執政權領寶牒自此始

權監修國史

權監修國史亦自錢處和始時當隆興二年十二月湯進之去位陳長卿未至故以執政官領之其後曾令之

鄭仲一姚令則蔡夢錫龔實之李秀叔范致能趙溫叔
皆用此例淳熙五年十一月溫叔為右丞相兼提舉國
史院錢景魏代為監修國史內批不帶權字景魏免牘
有曰丞相兼領止加承攝之名忽冒真除蔑近聞比周
益公在翰林當為答照援故事乞帶權字許之蓋一時
直筆者偶失契勘故景魏以為疑自後率帶權字

權提舉國史院

權提舉國史院自乾道元年三月虞并甫始時以相闕

故與錢處和分領兩史院其後魏南老李秀叔施聖與
皆以執政官暫權闕相故也南老邁入相落權字秀叔
聖與皆以命相免兼該監修國史者指日厯也提舉國
史院指正史也紹興中秦會之以監修兼提舉二十六
年五月並命沈守約萬俟卨二相始分領焉時左相
領日厯右相領史院若止命一相則參知政事權提舉
國史如有年乾道九年十月曾欽道以右揆提舉國
史院而鄭仲一以參政權監修國史日厯蓋循例以史

院命相而非以史院為重自是並置二相則復舊制以
監修國史命首相止置一相則宰相領史院所謂監修
國史者以首參權領焉迄今遂為永制

權提舉實錄院

權提舉實錄院者自乾道二年十二月魏南老始其後
李秀叔亦為之皆以無相故也紹興以後置二相則右
相仍領實錄院無次輔後則以執政官權

庶官除同修國史

同修國史故事未有以庶官為之者隆興初胡邦衡以起居郎兼權中書舍人始特命焉乾道二年冬洪景廬亦以起居舍人兼同修蓋用此例四月胡長文自右司除起居舍人明年有旨陞帶長文引故事力辭乃命兼編修如舊自趙溫叔已後無復兼同修者矣

權同修國史

權實錄院同修撰

權同修國史權實錄院同修撰自淳熙三年正月李文簡始故事修史修撰皆從官為之惟胡邦衡嘗以起居

郎兼同修撰後無繼者及是文簡再還朝為秘書監上
欲付以史事故特命焉後兩月遷禮部侍郎遂落權字
嘉泰後陸務觀李季章皆踵為之近制修撰同修撰通
止四員檢討六員嘉定二年十二月曾君錫自起居郎
兼檢討官除權侍郎當陞帶而員數已溢乃降旨權以
檢討官繫銜候有闕日陞帶從官為史討自此始

翰林權直

學士院權直

翰林權直學士院權直皆自崔大雅敦詩始故事直院

必以侍從若左右史為之其間沈虛中以少司臣莫子
濟王經伯王季海以宗正太常少卿兼權直院蓋殊命
也乾道九年十二月孝宗初命大雅秘書正字兼翰林
權直踰年以憂去淳熙五年九月復詔為樞密院編修
官始議以翰林乃書藝應奉者所居非專指詞臣也遂
改兼學士院權直自是葛楚甫趙大本熊子復皆以學
士院權直為名十六年正月倪正甫始復兼翰林權直
紹熙後或稱學士院或稱翰林蓋不常云

直舍人院

直舍人院祖宗時有之官制行以中書舍人為宰相屬官號後省故以他官兼攝者但為之權舍人而已嘉泰四年李季章以宗正少卿權中書舍人而中字犯祖諱季章辭有旨除公移外權以直舍人院繫銜季章乃受命不知舍人院廢已久蓋大臣失于討論也

侍立修注官

侍立修注官者自羅春伯始祖宗時以起居舍人寄祿

而更命他官領其事謂之同修起居注官制行復為郎
舍人淳熙十五年十月春伯自戶部員外郎除右史避
曾祖諱乃以為太常少卿兼侍立修注官其後兩史或
闕則降旨以某人權侍立官蓋自此始

庶官兼侍講

侍講自去學士後秩止正七品然率以侍從官兼之紹
興五年閏二月范元長以宗卿朱子發以秘少並兼之
蓋殊命也乾道六年十一月張敬夫始復以吏部員外

郎兼侍講蓋中興後庶官兼侍講者惟此三人若紹興
二十五年十月張扶以祭酒隆興二年八月王宣子以
檢正乾元七年九月林景度以宗卿入經筵亦兼侍講
者蓋扶本以言路兼說書就陞其秩宣子時攝版曹景
度當為右史且有敬夫舊例故稍優之皆有以也近歲
陳正仲朱仲文以諫官兼侍講後遷少常因而不丟蓋
用胡邦衡例其餘庶寮無復兼者矣

祖宗時臺諫不兼經筵

祖宗時臺諫例不兼講讀蓋以宰執間侍經筵避嫌也
神宗用呂正獻亦止命時赴講筵去學士職中興後王
尚書賓為御史中丞建請復開經筵遂命兼侍講自後十
五年間繼之者惟王唐公徐師川二人皆上意也紹興
十二年春万俟卨中丞高羅諫議擢並兼講讀蓋秦楚材
是時已兼說書便於傳導自後繼之每除言路必兼經
筵矣檜死遂罷兼自二十五年十月至三十二年慶元
臺丞諫長兼經筵者止三人後臺丞諫長洎副端正言司諫已上無不預經筵者未

及兼者惟張伯子李景和二人云

非臺丞諫長而兼侍講

正言兼說書自巫端明偁始副端兼說書自余端明堯弼始察官兼說書自陳少卿夔始紹興二十五年春董

殿院德元王正言珉並兼侍講非臺丞諫長而以侍講

為稱又自此始其後猶或兼說書臺官自尹穡

隆興二年五月

諫官自詹元宗

乾道九年十二月

後並以侍講為稱不復兼說

書矣

修注官以史院易經筵非故典

自朱子發後修注官多得兼侍講嘉泰二年八月林伯玉自殿中侍御史兼侍講除起居郎其年閏十二月鄧伯允自右正言兼侍講除起居舍人伯玉改兼權刑侍伯允改兼史編檢討實非故典也開禧元年八月婁彥開自言路徙奉常兼權中書舍人亦以史院易經筵遂為定例三年十月朱仲文自司諫改奉常兼講如故意者以其兼權史侍故也十一月王簡卿去諫院為左史

仍兼崇政殿說書言者猶以為不可罷之嘉定元年春黃伯庸自右正言兼侍講除起居舍人兼如舊合故典矣

自渡江後惟王樞密論以右史兼說書其他無此之比也

博士正字兼說書

崇政殿說書渡江後自尹彥明始彥明初以秘書郎兼之後多以命卿監察官中間王龜齡范致能王與正皆以郎官兼亦殊命也若紹興中陳少南以博士兼說書乾道末崔大雅以正字兼說書此則國朝所未有也

非科目而兼講讀者或濫吹

中興後非科目進身而侍講讀者自徐師川始其後陳幾
叟蘇仲虎孫太沖尹少稷王能甫姚令則蘇季真繼之
議者謂亦無不濫吹若錢處和伯同父子則弟以為執
政兼官非諸人比耳

太常除卿

太常卿正四品自元豐改官制後虛而不除嘉泰三年
十一月陳正仲自江西提刑赴召除太常卿告謝日賜

三品服非常制也不數日改權兵部侍郎疑大臣失于
討論故亟遷之耳

館閣校理

館閣校理未改官制前有之嘉定初留舍人元剛召試
除秘書省正字元剛仲至之孫也以祖諱辭乃命權以
館閣校理繫銜此亦元豐以來所未有

宰相兼東宮三少

東宮三少在祖宗時為散秩前宰相及執政官告老者

例得之仁宗在春宮李文定公以參知政事兼賓客及
陞相位遂進兼少傳此宰相兼宮僚之所從始也天禧
末皇太子同聽政乃以首相丁謂兼少師樞使曹利用
兼少保而參樞諸人並兼賓客自從神宗欽宗孝宗
光宗在東宮皆不復置開禧三年十一月韓侂胄既誅
史同知自詹事入樞府乃進兼賓客已而太子侍立遂
以錢丞相兼太子少傳明年並置二相左相改兼少師
右相兼少傳未幾右相丁內艱左相亦去位又明年右

相起復遂進兼少師焉

東宮講官

東宮講官者舊無有嘉定乙巳春侍講徐文子少卿接
伴北使乃命館職劉仲則時暫兼權仲則名榘莆田人
時為著作郎

太子舍人

太子舍人渡江以前有之紹興乾道間皆不置嘉定初
始置除王舍人元實後以館職任伯起兼之慶元令太

子舍人與中書舍人皆從七品而中書舍人又在舍人之上然故事亦嘗除

皇太子宮小學教授

皇太子宮小學教授舊無有紹興三十年孝宗為建王
王龜齡以校書郎兼小學教授時光宗與莊文太子魏
惠憲王皆就傳故也淳熙七年今上為英國公年十三
未就傳其年正月大理正王尚之面對乞依故事擇儒
臣為東宮小學教授遂命楊嗣勲兼之

上命宰相精擇其人趙丞相言

楊甫儒雅蘊藉操守甚正
遂命之繼之劉德修也

資善堂翊善讚讀

資善堂翊善讚讀紹興五年六月初置以命朱子開范
元長時孝宗以建國公就傳故也其後孝宗出閣就第
而信王幼亦命近臣踵為之開禧元年七月皇子初封
榮王命程少逸左史兼侍讀少逸以祖諱辭乃命軍器
監趙子中兼領其不稱王府而以資善繫銜蓋以未出
閣之故子中江陰人名夢極嘉定初卒于給事中

資善堂直講

資善堂直講紹興中無有開禧元年七月初置以命鄒景初皇子之未王也景初以著作郎兼小學教授故就用之

資善堂小學教授

資善堂小學教授者舊無有慶元六年四月始初以命蕭國博景伯時東宮纔封衛國公未正名故也舊制資善堂稱翊善若皇孫則為皇太子宮小學教授至是參

用之景伯名達新喻人父燧淳熙中執政景伯淳熙十四年廷試第四名慶元四年冬除太學博士明年遷國子又明年春兼實錄院檢討官遂為學官之選數月除秘書郎不數年累遷至禮部尚書云

資善堂說書

資善堂說書者開禧元年七月初置以命張聲之聲道時太子初就傅李諫議伯珍建請增置講官用嘉祐故事以說書為名從之然嘉祐間英宗止除防禦使故官

僚以皇子位伴讀說書為稱自紹興初已置資善堂珣
善贊讀其後王府又置直講官屬之名甚備至是乃沿
襲故名蓋伯珍失于討論也

皇子位說書

皇子位說書紹興三十二年八月置以命吏部員外郎
何甫司封員外郎陳良佐光祿寺丞唐堯蓋時莊文太
子魏惠憲王光宗皇帝皆以正任奉朝請用嘉祐典故
也九月三皇子皆封王乃置直講讚讀如舊制

王府翊善

王府翊善國初以來有之品秩亦不甚崇今慶元令為從七品雜壓在翰林良醫之下蓋庶官也孝宗初就傅范元長以待制兼資善堂翊善自是率以從官為之其後親王府不復除第以朝士兼贊讀直講而已淳熙末今上在嘉邸留丞相始薦用黃文叔自秘書郎除翊善不為兼官非常制也其後文叔遷起居舍人歷中書舍人給事中皆兼翊善是以從官下兼七品之祿紹熙四

年夏文叔坐論鄭侍郎汝諧事直拜兵部侍郎去翊善
文叔辭不拜王為之請後月餘改寶謨閣待制仍兼翊
善始終六年云

王府記室叅軍

諸王府記室叅軍靖康以前並置或以朝臣兼領係第
二任知州者得理提刑資序渡江後不除乾道初魏王
典藩始並除二員叙位在諸州通判之上後用耿子直
申明並同職事官序位在正字之下今慶元令親王府

記室從八品在供奉官之下兩使職官之上然魏王府所用率以望人為之非通判職官之比矣凡記室長史司馬皆以二年為任

乾道七年二月己巳降旨

吳益王府教授

吳益王府教授在紹興初謂之親賢宅講書從舊制也十二年改為府教授命館職二員兼之尋又併為一員所教親賢宅者南班宗子也三日一上講月給湯茶錢十緡舊將本府料錢充之淳熙中劉德修為教授辭不

取孝宗聞其事遂命戶部給焉

宗學博士

宗學博士舊諸王官大小學教授也至道元年太宗將為皇姪等置師傅執政謂環衛之官非親王比當有降乃以教授為名咸平初遂命諸王府官分南北宅教授南宮者太祖太宗諸王之子孫處之所謂睦親宅也北宮者魏悼王子孫處之所謂廣親宅也二宅教授初止六員治平初以宗室浸盛有詔三十以上增置講書四員十

四以下別置小學教授十二員以分教之崇寧初以宮
宅相去遠乃令各宮置大小二學增教授二員不置講
書五年又改稱某為宮宗子博士位在國子博士之上
靖康之亂宗學遂廢紹興四年復始置諸王宮大小學
教授二員隆興省官旋減其一自是月朔止一人上講
所教惟南班宗室十餘人往往革魄每教授初除朔望
則赴堂一揖而退嘉定九年十二月始復置宗學改教
授為博士又置宗學教諭一員並隸宗正寺博士在太

常博士之下教諭在國子正之上俸給人從賞典依國子博士及正體例於是宗室疏遠者皆得就學而彬彬可觀矣

旋有旨復存諸王宮大小學教授一員

提舉太史局

提舉太史局紹興五年初置以命權戶部侍郎薛象先蓋祖宗時有提舉司天監如司馬公錢彥遠沈存中王和甫輩皆嘗為之趙子直秉政用此故事其後言者摘指之蓋弗深考耳

國用司參計官

國用司參計官者開禧二年始置乾道間孝宗嘗命輔臣兼制國用然無官屬但於三省戶房置國用司而已侂冑將用兵既復故事始以侍從一員兼參計官卿監一員兼同參計官募人陳遺利又索諸路諸司州縣歲帳而取其餘非乾道設官之意矣然是時四川州縣諸司皆不以實報惟江浙諸州頗遭掊取之害侂冑誅亦廢

提領拘催安邊錢物所

拘催安邊錢物所者嘉定元年置時甫廢國用司而侂
冑及諸閹省吏之家貨財皆已薄黃伯庸疇若為殿中
侍御史請劾此名遂命與戶部侍郎沈信叔詵同事
即御史置又以宰屬一員同領仍許伯庸不拘常制到
堂伯庸等請卿監一員提領安邊庫朝士十二員為拘
推官乃揭榜募人言拘催事許之其後會其入歲得十
七萬緡專充北敵所增歲幣其田宅契券皆藏之御史

臺庫命臺官一員典領局罷伯庸已下皆進官有差

六院官入雜壓

六院官入雜壓事甲記已具淳熙四年既削去近歲乃復舉行其班在五寺主簿之下大學博士之上六院官

通計十二人皆得轉對但不入品耳然六院本以為邑

有政績者為之故例為察官之選

登聞檢古院監官各一員諸司諸軍糧料

院監官各一員諸軍諸司審計司幹辦官各二員官告院主管官二員都進奏院監官二員

四提轄

四提轄謂權貨務都茶場雜買務雜賣場文思院左藏
東西庫是也權貨務場掌醴茗香礬鈔引之政令紹興
初沿宣和舊例置提領官率以故省吏為之後乃改用
士人行在建康鎮江三務場歲入凡二千四百萬緡

建康一千

二百萬行在八百萬鎮江四百萬

皆以都司提領不係戶部之經費而

在建康鎮江者分屬總領所焉開禧末以總所侵用儲
積錢始令經隸提領官不屬總所買務賣場蓋唐宮市
之遺制近制凡宮禁用料貨紙劄文思院之制造和劑

局之修合皆所取給焉至若斤左帑封樁之弊與編估打奪則賣場掌之紹興六年始置提轄官總其事文思院掌金銀犀玉工巧之制綵繪裝鈿之飾若輿輦法物器皿之用監官分上下兩界而轄官兼總之左藏右庫以儲幣帛絕紬之屬其歲入率百四十萬端西庫以儲金銀錢券絲纊之屬其錢券歲入率二千萬緡宮禁百司禁旅三衙祿賜皆取給焉監官凡五人分帑而治轄官一人總之紹興間擇丞監之若簿之隸於計曹者兼

領之乾道七年四月始置先是四轄官外補則為州內

遷則寺監丞簿亦有經為雜職監司或入三館者

乾道八年

十二月權貨王裡除福建市舶左藏王揖除九路近歲鑄錢司淳熙七年三月熊子復自文思除檢書郎

人望稍輕往往更遷六院官或出為倅倅非曩日之比也矣

三省監門官

三省樞密院監門官舊以小使臣為之嘉定六年九月諫官鄭景韶言部門以京朝官則省門事體尤重遂亦

命京朝官曾作縣通判資序人為之

六部監門官

六部監門官紹興二年初置秩比寺監丞郎官有闕得兼之內遷則為寺監丞或權郎外又置諸路總領紹興十年呂郎中希常二十四年蘇寺丞振是也乾道後補外止為州內遷止為寺監簿紹興後又有為係倖者其選滋益輕陳勉之與王誠之給事有舊

誠之名信鹿水人

迭用

其子駒驎為之二人皆小京官監當駒以言者論其資

淺已之比勉之南遷麟亦罷去

六部架閣官

六部架閣官者崇寧間始置迄宣和再置再省紹興三年立六部架閣庫十五年復置官四人舊制成案留部二年然後界而藏之又八年則委之金耀門文書庫今金耀門無復曩司則悉藏之架閣矣主管官號掌故擇選有時望之人為之例為編刪學官之選近歲滋潤益輕至有待次累年者朝廷患之嘉泰末有旨非闕官不

除有選人家閩中其父與陳勉之有舊至是入都見勉之求為掌故勉之對衆厲聲曰外間豈不知近旨見闕方除此何可得衆為之踧踖後旬日竟除掌故或疑其由徑而得者問之徐曰丞相耳或曰丞相前日之語甚峻何以回造化耶其人即于坐側取一幅書示之乃勉之答書也畧曰珍貺鼎至晃耀老目或問珍貺之名曰書生安得珍玩比所請不遂適從王家肆中見粟金臺盞十具重百星以四千緡得而獻之耳聞者嘆息而去

嘉定七年八月又置
三省樞密院樞密閣官

宮觀使

宮觀使自真宗時始置以現任宰執領之及王文貞公
罷政始以太尉領王清昭應宮使此前宰相領宮觀之
所從始也熙寧初富文忠公弼以使相領集禧觀使居洛
此宮觀使居外之所從始也渡江後前宰相在經筵者
不以官高卑率為宮使若他官則使相以上乃得之其
居外者必官至三少乃除淳熙中崇憲靖王自節度使

拜使相封郡王中書進擬提舉洞霄宮周文忠當制
引故事宗室使相外居者當得觀使上批如所請紹熙
初趙文定以使相判潼川府乞奉祠乃除醴泉觀使
非舊典也開禧末陳勉之以特進罷相不帶職乃亦除
觀使蓋章達之侍郎當制失之翌日李季章進呈改
提舉洞霄宮合故典矣天禧以前崇觀以後宮觀使之
名甚衆渡江以後宮觀不復置而觀使有三前宰相則
得醴泉宗戚則得萬壽又其次則得佑神云宣政間又

有提點宮觀官在提舉之下主管之上今省

臨安少尹

判官推官

臨安少尹乾道七年五月置用敷文閣直學士晁子正為之以東宮領尹故也子正既罷沈德之姚令則輩皆以權侍郎繼為之九年五月東宮解尹事復置司守如故始置少尹又置判官二員推官三員判官李秀叔以起居舍人劉文潜以國子司業兼推官則正除金部員外郎陸之望將作少監馬希言朝奉郎錢佃判官依兩

省官奉使推官序位在知州之上任滿理為知州一任

五月十二日初命刑獄公事皆決于少尹皇太子止就

丙戌降旨

東宮裁決少尹日受民詞以白太子日間率寮屬詣東宮

稟事惟命官犯罪以及餘人流配已上則具事聽東宮

裁酌凡文書應奏者太子繫銜朝省臺部則少尹以下

連申寺監及本路監司並令移牒舊兩通判職務令第

一第二員推官主管僉判職官職務令第三員推官主管

餉有旨少尹比倣知府判官比通判推官比幕職官其

統臨職分並照從官條例施行

六月二日
己巳降旨

用太子請也

或謂子正所建明繇是與文潛不叶而罷明年佃除吏部郎中又請以三推官分治三獄從之

九月丁亥降旨

寧國府明州長史司馬

諸王府長史司馬唐有之本朝不置以親王不領事故也乾道七年二月魏惠憲王出鎮宣城始置寧國府長史司馬序位依兩省官奉使法淳熙二年十月移四明亦如之初議長史得治民舉吏如郡守司馬如通判於

是沈度請本府公事並經長史決遣畢具名件申魏王
照會長史司馬五日一詣王稟事許之後判曰王言如
此則是長史欲處臣於無用之地何以謂之判寧國府事
乎望只委長史司馬分治財穀之司依舊令臣引押吏
民詞狀奏可

前旨七年四月壬戌後旨四月庚辰

後移明州王又請置制

司得自舉吏淳熙二年四月癸亥許之仍免給朝典云

制置大使

制置大使唐有之本朝不除紹興初始以命席大光時

大光以前執政帥長沙而大將王瓌已先為制置使故加大光大字猶祖宗以文臣為制帥之意也其後李伯紀在江西趙元鎮在浙東呂元直在浙西皆用此例及大光將入蜀朝廷以吳玠已為宣撫副使乃除大光成都等路安撫制置大使位在宣副之上大光以憂去位遂不復除開禧末江淮用兵起丘宗卿守金陵留鑰宗卿嘗以僉樞督視軍馬於是趙淳已為江淮制置使乃沿故事命宗卿為江淮制置大使後宗卿召以何自然

代之自然始兼江東安撫俄申命兼大使如宗卿例已而罷四川宣撫又以安子文為制置大使兼知興元朝議以子文恩數視執政故加大字先是李端友程東老趙溫叔皆以前宰執知成都止為制置使趙德老執政恩例亦然今別加大字蓋用自然例也舊例四川制置大使及制置使結銜皆在知府事上比子降文告其結銜乃在下亦非典故

庶官結銜稱安撫使

安撫使舊制大中大夫以上曾歷侍從官者乃得之或
若庶官則止稱主管某路安撫司公事隆興中馬舍之
騏自起居舍人兼直學士院淳熙中陳少卿叔達自宗
正少卿兼權給事中補外後馬以中大夫秘閣修撰守
瀘陳以集英殿修撰守洪皆不稱安撫使蓋故事也嘉
定二年二月劉德修以中奉大夫右文德修撰守襄陽
及出告乃正稱安撫使德修嘗為起居郎非侍從不知
何故乃爾問其諸子者亦莫之知云爾

十都統制

諸軍都統制者自渡江以前亦有之然未為官稱蓋是時陝西河東北三路皆以武臣職任高有知畧者為之馬步軍副都總管遇出師征討則加以都統制軍馬之名猶今節制軍之類非有司職分也建炎初置御營司始以劉郈正為本司都統制其下分為五軍各置統制以諸將張韓等為之苗劉既誅張韓又改為御前左右軍都統制則已不隸御營司矣紹興初御營司罷有旨

諸大將之軍稱神武五軍諸小校之兵少者則謂之神武
副軍並隸樞密院俄又以神武名乃高歡諡號遂改神武
五軍為行營五護軍韓世忠稱左軍劉光世稱右軍張
俊稱中軍王瑛稱前軍巨師古稱後軍其後右護軍叛
降偽齊於是吳玠軍始以右護軍為號四年玠陞宣撫
副使其弟璘為右護軍都統制諸將故與璘等夷者惟
楊政郭浩乃以改為宣撫司都統制屯興元府浩為樞
密院都統制屯金州十一年張韓岳三大將皆罷兵乃

收其所部為御前諸軍而都統制皆以屯駐州

名軍額

之上獨川陝如故十九年鄭仲亨罷宣撫副使於是漢
沔兩大將次第改為御前諸軍其繫銜則璘稱利州西
路駐劄御前諸軍都統制政稱利州東路駐劄御前諸
軍都統制浩時已死故金州無都統制但以武臣知州
事節制御前軍馬入銜至三十一年王彥始除金房開
達州駐劄御前諸軍都統制乾道五年王公明入蜀奏
乞三都統並依江上諸軍隨駐劄處繫銜庶幾一體其

十月有旨從之江上始有京口秣陵武昌三大軍紹興
末金將內侵楊和王請置江池二軍劉太尉請置荆渚
一軍嘉定初蜀叛既平安觀文又奏分興州十軍為沔
利二軍沔州除都統制利州除副都統制自是天下有
十都統矣

荆鄂一軍而正帥在鄂
副帥在襄淳熙新旨也

建炎雜記乙集卷十五

欽定四庫全書

建炎雜記乙集卷十六

宋 李心傳 撰

官制二

乾道正丞相官名本末

虞雍公獨久上眷禮極厚既又以梁叔子靖重欲遂相之而無其端會易三省官名乃議以僕射之名不正欲采用漢舊制改為左右丞相令學士禮官對論時乾道

七年十二月辛酉也先是已有旨依舊制服靴

祖宗時百官服

靴徽宗將釋廢乃易靴為履以示禁異服之漸

虞公不樂曰近已易履為靴今

又易相名與外國奚辨蓋為金人詳定官制已改左右僕射為尚書左右丞相故也有司知其意不遽上至八年正月戊寅僅條具歷代宰相官稱申尚書省禁中即聞之翌日遣中使至學士院細問其事學士周子充以其事奏後二十日御筆付院云尚書左右僕射可依漢制改作左右丞相學士院降詔子充草詔

以進後二日付外施行二月乙丑也後五日上自德壽
宮還日已晡召子充對選德殿上微有酒所袖出御筆
云比來一二大臣同心輔政夙夜匪懈漸草苟且之風
以副綜覈之意深可嘉尚今因除授宜示褒典虞允文
可特進左丞相梁克家可正奉大夫右丞相賜茶畢
日已暮矣遂自複道秉燭歸院辛亥百官集文德殿初
謂改易相名耳雖虞公亦以為然及雙制出在庭愕然
先是子充嘗奏並命二相而遷官或三或四更取聖裁

上曰特進一官即少保所以允文三官議者疑學士有所抑揚而不知上自有旨也後數月虞公罷相乃除少保節度使則知聖意先已定矣是月臺諫官皆坐論張說罷去而蕭果卿自察院升副端三月甲戌也果卿方以疾告後二十日甲子始入謝比對首論前歲浙西夏滂秋旱江湖淮南歲比不登民多流離今正陽之月天多沉陰寒氣慘慄是謂常寒側身修行茲其時矣漢時災異策免三公以此上雖嘉果卿稱職

周子充作果卿墓誌載聖語云

卿所論甚當
可謂稱職

而待虞公素厚乃戒果卿毋納副本虞公
聞之上章求去即出北闕門待罪家屬亦乘舟之仁和
館是日即行翌日凡再宣押虞公力丐免上許之已而中悔
復賜御札云早來面諭以卿堅辭欲令卿典近藩措置
邊防聞卿有歸蜀之論殊失朕懷今已堅留卿相位無
復固辭以體至懷又翌日再押赴都堂治事於是御筆
除果卿直秘閣湖南提刑其月十一日己酉也制畧曰
之敏剛方不撓質直而明造膝之詞有犯無隱正人去

國豈朕所欲哉

是時李秀叔林景度為舍人恐是秀叔行

劉焞文潛時為國

子司業兼權臨安少尹或謂文潛實草是疏以授果卿

故果卿去御史之十九日文潛亦出為江西轉運判官

盖以此也其年九月虞公復以蘇李真侍御有言力求

去因請任入闕之事遂除以四川宣撫使焉

大臣去位不除職

國朝大臣自仁宗以後其去位未有不得職名者雖臺諫交章論列亦必除職補郡而後徐罰之典加焉乾道初葉

子昂魏南夫並相會冬祀大雷於是二人並守本官罷非常制也淳熙初有詔宰執侍從非有功不除職其年葉夢錫以言免相遂守通奉大夫知建寧府紹熙初王謙仲為樞密使又用何自然章降一官放罷凡此者皆非常制

紹興至開禧督府廢置本末

國朝故事大臣統兵者率稱宣撫使韓子華為首相猶然渡江後諸大將官既高皆為宣撫使此名益輕於是宰相統兵則稱都督自呂元直始也元直始以都督江

淮兩浙荆湖軍事為名開府江上過平江而守臣席大
光有所闕白始覺為右相秦會之所傾其後軍潰引疾
求去乃命還朝遙領而孟富文以參知政事權同都督
治軍建康久之去權字同都督之名自富文始也元直
富文繼罷朱歲一獨相以元樞趙元鎮有人望忌之乃
奏除川陝宣撫處置使元鎮乃與吳玠同使名為嫌遂
改川陝都督荆襄諸軍事既而張德遠以敗劉猷之功
同相乃並兼都督諸路軍馬元鎮尋去位德遠以淮西

軍潰而貶併其府罷之德遠先以行府為名往來視師
及上幸建康則督府在內德遠貶元鎮會之復相共議還
臨安而兵亦寢矣逮金亮闕江諸將皆敗始議以右相漢
章為都督漢章辭乃命葉審言以元樞督視江淮軍馬
督視之名自審言始也孝宗即位德遠以樞密使為江淮
都督汪明遠以參知政事為荆襄督視方城失守明遠
得罪德遠併督之符離失律德遠罷歸而金又寇江乃
以左相湯進之為都督進之憚行遂命故將楊存中同

都督軍馬用富文故事也既而兩淮皆陷進之益懼乃
除存中都督而命王瞻叔以參知政事為督視瞻叔亦
固辭上大怒遂與進之相繼而罷開禧用兵鄧伯允薛
象先以宣撫使抵罪乃外除丘宗卿簽樞督視軍馬宗
卿與侂冑不協再閱月而免張肖翁以元樞代之不勝任奉
祠去數月吳曦反復命李季章以參知政事督視四川軍
馬既而有裂土之議又罷行自是不復除都督矣

倪正甫鄒景初論皇子不當贈師傅

嘉定元年閏四月皇子薨詔吏部太常寺討論贈官典故
吏部引國朝會要元豐四年鄆王侂政和三年漢王椿
故事贈太師尚書令追封肅王王上第八子也倪正父
時以禮部尚書兼給事中引治平二年王禹玉等議皇
子以師傅名官於禮未安乞止贈尚書令詔從之余謂
吏部太常寺固失之而正父所奏亦未盡也乾道中省
三省官長易以左右丞相則所謂尚書令者蓋無此名
矣乾道二年孝宗少子恪贈淮康軍節度使開府儀同

三司追封邵王此事且最為得體而議禮者皆近不及之蓋弗深考耳三年十一月皇子靖王復有維垣之贈鄒景初給事言子為父師於禮不順然前是諸皇子或已贈太師矣景初俄以親老求去遂除次對守泉州云

趙善俊乞文階去左右字

祖宗未改官制前以官寄祿然因唐舊典分別流品甚詳不相混淆有出身無出身及進士上名賢良方正曾任館閣省府之類遷轉皆不同犯贓及流外納粟尤不

可使汙於仕流蓋不待分左右也元豐官制始行一之
然猶有一官而分左右者徒以少優進士出身而已至
元祐中遂自金紫光祿大夫至承務郎皆以有出身無出
身分左右則稍復祖宗之舊而不盡也至犯賊罪則併
去左右二字論者尤以為當然龜山先生與門人言則
謂沮人為善之路其所見益遠也紹聖以後以其出於
元祐故事復去之紹興初方務行元祐故事左右字之
制亦復行又下逮於選階而流品稍別矣淳熙改元趙

善俊建言以為本范純仁偏蔽之論請復省去從之

元

三月戊子降旨

蓋時方尚武善俊迎合而言非公論也善俊成

王仲榮曾孫中進士第以左朝奉大夫直龍圖閣知
襄陽府入對後十餘日又以前任事特轉一官及死周
洪道為墓誌脩載其事謂自是無裏言蓋薄之也

元豐乾道武臣正任員數多寡

元豐初節度觀察使纔八員防禦團練使副使共二十
員而宗室不與焉乾道初節度觀察使至四十員防禦

使至遥郡僅二百員而宗室亦不與焉趙德莊彥端權

尚右郎官嘗請裁酌後不行

德莊以元年八月建請

建隆至元祐選人陞改舉主沿革

選人陞改國初無定制建隆二年命翰林學士文班常
參官曾任幕職州縣官者各舉堪為幕職令錄一人職
令用舉主自此始開寶三年四月命翰林學士及文班
陞朝官等各於現任前任藩郡幕職州縣官中可舉堪
為陞朝官一人選人用舉主改官自此始

乾德二年六月詔侍從卿

監卽官各於京官幕職州縣內舉堪為通判然自建隆者一人又在此前今專記舉京朝官事始

至淳化二十餘年舉京官朝官之敕纔五下固無冗濫之失也至道二年閏七月有司言諸州闕監當京朝官共五十餘員乃命左丞李至等八十四人各舉州縣官廉恪有吏幹者一人景德元年八月以幕職資序人少命常參官二人共舉州縣官一人充幕職大中祥符三年正月詔內外所舉幕職州縣官並須經三任六考限受薦自此始五年六月詔自今在京常參官二員共舉

幕職州縣官一員充京官者聽舉主用兩員自此始景德

元年八月止天禧元年五月敕兩省五品已上歲許舉
是一時指揮

京朝官五人陞朝官許舉三人薦舉限員自此始天聖七年

十二月詔轉運使發是月用判流內銓呂夷簡言陞朝
運使副使不限人數

官因事降充監當者不得舉官及知縣朝臣不得舉所

統攝處幕職曹官蓋前此內外陞朝官皆得舉京官故

也二年十月中書言郡臣舉幕職州縣官充朝官者俟

舉主及五人即以名聞庶懲濫進舉主用五員自此始

三年六月又用監察御史李該言今轉運至諸州通判並舉本部幕職州縣官餘陞朝官未經通判已上既差遣者不在舉官之限所舉之人須是在任舉主內但有轉運制置發運提點刑獄勸農使二人便與依例施行若止一人即更候常參官二人保舉並與磨勘非通判以上不得舉官非現任屬吏不得受薦及舉主須用職司皆自此始熙寧初常平使者得薦吏如提轉乃罷通判舉官元祐初暫復之俄廢自是薦舉之法益密而冗

濫日盛矣

隆興至淳熙立改官員數

祖宗以來選人改官亦無定額元祐中孫莘老為吏部

侍郎始定歲百員為額後亦不行紹興後多不過九十

員少或五十員

二十年八十八人二十五年六十八人三十年七十四人三十二年五十八人

捕盜及職事官皆不在數三十二年孝宗登基其年遂至一百一十

三員言者患之請為之限隆興元年春詔吏部開具三

年舉過員數措置立額取旨

三月己酉降旨

其夏遂詔以三十員

為額內將十員充歷任十二考限減舉主改官人數如

不足並聽闕

四月己未降旨

未幾中書言今方七月止闕二員

若積累數年必多留滯乃詔吏部且依常年放行叅照

格法裁減薦員開具申省

七月戊申降旨

於是議者請舉官補

發之數毋得出一年之限而諸部長及少卿等各舉員

數分上下半年薦舉仍於七十員額內量添二十員若

減舉官之數乞以七十員為額許之

二月乙巳降旨

尋又詔增

十員引見拜職事改官共六十五員四川換給十五員

而特旨改官不在其數

四月癸巳降旨

自是不復改然四川舉

官之數一歲毋慮百五十員而磨勘之額僅及其半有
溢額者謂之待班朝廷知之或因事降旨特偕一班不
為定制迄今嘉定六年有待十一年班者若南士之入
蜀者則舉薦既盈遂歸于南班引見故無留滯積壓云
爾

隆興至嘉泰積考改官沿革

隆興初張子公為同知樞密院事首論薦舉改官請求

貨賄之弊乞取紹興以來每歲改官酌中之數立為定額凡在選者量其年勞以次遷改歲終考核不得過所定之數而闕陞者亦如之所有薦章權行寢罷庶幾銓約均平而在選者人人有京秩之望其有以卓然之才被

不次之陞者不在此限詔侍從臺諫詳議申尚書省

隆興

元丰二年議者以為自太祖以來皆有薦舉之制今若患

其奔競遂盡除之何異因餽而廢食于是學士承旨洪景嚴給舍金彥行劉共父張貞甫周子充共議乞嚴舉

主連坐之法不許首免量其罪之輕重而停秩任辛巳

李中丞時為臺諫長議以為宜取選人九考十考者與

減主員數事下吏部既而凌尚書景夏奏乞將選人考

法行從之

八月甲申降旨

自是通以百員為額後又不行乾道

三年周表卿權吏部尚書言其太濫乞每歲薦舉人一

百人監賞以三人四川換給二十人立為定額其所立

員額如歲中不足聽闕如員數有溢出許於次年施行

仍理為次年之額捕盜功賞改官人不在其限從之

六月

已亥降旨是冬起居舍人黃仲秉建言四川見管六十一郡

每歲止得改官二十人東南共管一百二十九郡每歲却得百人除管職事官之外外路教授磨勘十餘員外其多寡不均灼然可見緣此東南至今止七十餘員而四川七月內已滿二十員之額豈無留滯之歎照定元祐隆興員數之額四川係在內之數今來創立防限將四川置之額外未見其可望通以百二十人為額並以鈔上日為先後之序上又從之

十月辛亥降旨七年冬虞雍公

為相建言吏部供到今年改官員數已溢三十餘人詔

令引見放行改官今後更不限定年額

十月甲辰降旨

自虞公

去位上則復嚴陞改之法淳熙四年引見改官八十二

員捕盜十二員五年引見八十八員捕盜十二員六年

五十七員捕盜十一員七年春周益公為吏部尚書因

請六年為額詔侍從同議王仲行為兵部尚書與同列

共奏以三年絕長補短言之歲不下百員今十二考以

上無賊私罪者減舉主一員

三月己酉降旨

繼而遂以八十員

為改官歲額內十員充十二考減主舉改官人數如不

足並聽闕

四月己丑降旨

蓋參用張辛二老之說也未數月中

書門下省言薦舉改官今方七月止闕二員若積累年

數必致拘礙乃命吏部且依常年放行仍措置合行裁

減員數申省取旨

七月戊申降旨

尋遂以百員為額

八月甲申降旨內

吏部引見八十員四川換給二十員乾道初黃仲秉為

起居舍人為上言以郡計之東南約三郡而改官者二

人四川約六郡而改官者二人多寡不均灼然乃命通

以百二十人為額焉

乾道三年十月降旨

及虞丞相當國始奏不

復限定年

乾道七年十月甲辰

而覺其太濫有七十員為額之令

淳熙七年二月已巳降旨

俄又增為八十員內引見並職事官共六

十五員換給十五員

七年四月癸巳降旨

而捕盜八員在六十五

員之內如不足即以薦舉改官人補奏

七年十一月已亥得旨

後

數年復有旨職事官改官許在歲額八十員之外

十三年三月丁酉得

旨進士一任回磨勘及歸正官循改者亦如之

十五年十二月

庚午得旨歸正官循至承直郎後歷五考即改宣教郎

自是引見者稍寬而換給

獨狹矣慶元末費戒甫為左選侍郎又請歷十五考以

上無贓私罪犯者得免職司舉主一員

慶元六年十月癸巳得旨嘉

泰中李景和為正言又請選人曾歷監當獄官縣令各

三考餘官三考無贓私罪犯者不拘有無京削許就磨

勘

三年二月降旨

吏部引見以八員四川換給以三員為額於

是東南應格者本昇等四人川路應格者蹇似之等二

人而已明年言者論其太濫謂使其律已奉公究心職

業則歷官十二考所事監司郡守何啻四五十人豈無

一為之動心者姑以今歲之應斯格者觀之大畧可見
詔吏部長貳詳議時吏部又得應格者余圭一員黃子
由適兼尚書乃奏乞歷上件三任通成十二考止用常
員舉主三員若係舉主闕陞人更減一員

四年五月開
甲申得旨

禧初言者又指其僥倖乞令侍從兩省臺諫官集議議
者乃乞堅守孝宗立定八十員之額其嘉泰以後積考

減員等指揮更不施行

開禧元年五
月乙巳得旨

識者謂薦舉改官

法未嘗不善也患在乎士大夫以私意汨之耳開禧末

季仲衍為益部刑獄使者有舊將之子以職司狀為請
仲衍厚待之將行語之曰興宗昔以職事受之先公今
不敢忘然舉賢王事也非報恩之物有貴人移書以子
壻相託者仲衍報之曰令壻奉公守法雖微命戒亦將
舉之如其不然有所未可嘉定初余弟仲貫甫自著廷
補郡將行面白諸公貴人乞勿薦士諸公皆從之真景
元繼除江東副漕朝辭入見又以劄子面諭之余謂
士大夫人人如仲衍景元則公道少伸而奔競之風庶

幾乎息矣若夫通番舶納賄賂又罪之至大者故不復
論

刑寺得舉外任人改官

禮部國子監長二得舉諸州教授改京官舊制也嘉泰
元年十一月言者以為大理評事止用舉主三員又評
事中亦有以改官舉削者常有是事余乞倣此例令刑
部長貳大理卿少得通舉諸路提刑司檢法官從之

四川舉削倍改官之類

四川改官薦牘以今嘉定四年計之當得一百六十五

紙帥臣監司八十紙

制司大使十一紙總領賦六紙茶馬司共五紙三路安撫司每司兩

年共三紙成都潼川提刑各五紙利路提刑五紙關外一紙夔路提刑三紙四路常平司每司兩年共三紙成

都潼川路轉運司各六紙內歲終不除副使者半利路運判每兩年又得關外三紙夔路運判兩年三紙又歲

終不除副使三紙四路提舉司每司年年一紙

前執政六紙費大資知州安大資

八縣已上二郡每年各舉二員通計四紙

潼川成都七

縣至四縣二十四郡每二年各舉三員通一年計三

十六紙

謂金印達綿雅合已蓬忠眉隆果資榮叙閬利州隆慶元興遂寧嘉定崇慶廣安軍

三縣已下三十一郡每年各舉一員通全年計三十一

紙謂瀘夔彭渠昌普洋成鳳涪沔簡隆階開萬施黔珍威茂黎文西和州重慶府大寧監石泉永康懷安梁

山南平軍無縣處三郡每年亦各舉一員通全年計三紙長寧

大安軍富順監以五紙一員歲舉改官約計三十一員而職司

稱焉大使十一四路
提舉共十九自淳熙七年有詔四川換給紙十

五員總而計之是舉削不收使者大半紹熙二年九月

置帥京仲遠以京官知縣闕人為詞奏乞增放散員數

朝廷難之然自後非特覃恩或制司奏請則必遞趨一

年開禧三年吳德夫為宣諭使又請侍班人不候改官一面注擬從之後三年議者以為不然乃復舊制

前宰執歲舉京官多非所知

祖宗之制前宰執歲得舉選人為京官者五員淳熙間減二員既得徧舉諸路故有力者競趨之大抵多非所知洪景伯罷政家居二十餘年所舉殆八十人有管珍者為樂平丞既得舉矣偶文書至即稽期數日書吏為措改奏檢實日以就之景伯即劾珍罔上具言惟宰執

有舉無刺目擊巨蠹吞聲喑嘿其辭切極疏入詔珍降
兩資舉狀令吏部退還或謂珍曰故被此劾番人能誦
言之且誦吞聲喑嘿之詞未知果何如也自慶元嘉泰
後前宰執舉削乃專以待政府言路之求類多不職所
舉人甚至空名剡牘以遺之非祖宗之遺意矣

選人三考外零日不許受京削

舊法歷任三考以上者許薦舉改官即循至修職郎雖
未及三考亦聽薦舉其後勢要子弟之初官者率以零

日受薦寒素者患之淳熙十四年慶壽覃恩舉天下廸
功郎無不循資者其年八月蜀帥趙子直建言舊法聽
三考薦舉改官者皆以三考為一任舉其成數而言今
於三考之外未罷其零日內輒敢並緣干請已非法意
今又該遇覃恩盡行補轉若一併許於二考之外聽舉
改官切恐干進之徒與夫勢要皆預得為他日計而徂
寒安分廉耻自持者欲脫選調愈不可得欲望將選人
一例許於第二任方得薦舉改官庶幾仕進公平不妨

寒俊之路未幾光宗即位乃舉行之又詔未成考之人不以罪去者於後任湊成三考聽舉改官初任未成考者勿聽以著為令

乾道淳熙裁損任子法

沿革附

乾道初朝廷欲損任子之數有請正郎隔三郊乃奏者有請立限員者有請正郎惟初郊及致仕各許奏一人者議久不決二年春王伯庠初除殿中侍御史乃為畫一狀以奏一曰正郎過郊有出身人奏上州文學無出

身人奏下州文學應奏文學者將來改官日並改次等
合入官二曰帶職員郎有出身人蒞事十五年初遇郊
及再遇合許奏一人無出身人蒞事及二十年止許初
郊奏一人俟至即如上法三曰中散大夫以上有出身
人奏將仕郎無出身人奏上州文學四曰侍從官有出
身人子孫奏承務郎期親將仕郎大功以下文學無出
身人遞減一等致仕恩澤又遞減一等五曰宰執子孫
奏依現行法期親登仕郎大功以下文學六曰又選依

此參酌其官至使相者依舊法止奏武階詔三省集議
再具條式將上取旨尋又令臺諫共同集議其年六月
始有旨使相蔭補依祖宗舊法七色補官人止令奏一
子餘不盡行也余謂伯庠此議亦頗得之但權倖貴游
皆所不便耳所謂七色補官者宗室女夫一也戚里女
夫及捧香二也異姓恩澤三也陣亡人女夫四也上書
獻頌文理可采五也隨奉使補官六也給減七也始議
以止當祿及其身不許更冒世賞若轉至合奏薦官候

將來致仕日與一名恩澤已嘗奏薦者不與既行之矣
九年七月又用吏部尚書李秀叔議應文臣帶職員郎
及武翼大夫以上生前未嘗奏薦者與致仕恩一名即
與嘗奏薦而被蔭人身亡者許再乞應朝奏武翼郎以
上補受及三十年者亦與一名淳熙四年二月韓無咎
為吏部尚書又乞非貶補授人許生前奏薦一名所謂
使相奏補文武臣各隨本色者淳熙五年十一月因曾
覲有請遂授曹价向宗良例降旨不行

四年四月覲已
有此請龔寔之

持不行其六月寔先是張說在宥府已詔武臣嘗任執

之賤至是行下

政者許奏文資

乾道九年十一月朔降旨

已而數視執政者亦得之

蓋戚里宗王與夫攀附之臣皆爭以文資祿其子不可

復正矣淳熙十年二月辛丑又從侍從臺諫集議應文

武臣致仕遺表恩澤並三分減一焉

宰相使相共八人前宰相七人執政

六人前執政五人見任尚書三人侍從二人宰執不帶職者依本官

雜藝出身不許任子

紹興初有伶人胡永年者積官至武功大夫過郊乞任

子趙子直為吏部尚書奏永年樂藝出身難以任子望立為定法今後似此雜藝之人補授不許奏補從之三年三月己亥余謂此等事非遇子直則他人必且放行遂為弊法矣但永年本伶倫而官極正使前後遷補乃無論列之人亦未可曉

嘉定四選總數

嘉定癸酉春仲貫補兼考功郎官四選缺無迭攝之員是歲四選名籍共三萬八千八百六十四員尚在六七

八九品名籍案京朝官以上二千三百九十一員有出身九

百七十五員致仕補官五百二十九員遺表補官九十二員大禮薦奏補官六百二十三員奉表補

官五十二員推恩補官五十員門客補官一十一員持受文學補官一十一員攝官補官一員襲封

補官二員宗室過禮補官一十四員尚右三千八百六

十六員奏補一千六百八十員武舉七十七員宗室

八十五員歸明歸正五十六員侍左一萬七千六員有

雜流非泛吏職二百六十員身四千三百二十一員奏薦六千三百六十六員

童子科二十八員攝官二十八員宗子該恩五百

六十員恩科五千六十三員進納四百一十九員流外一百六十五員侍右參部使臣

一萬五千六百單一員

奏補七千七百一十八員 宗室二千九百一十四員 軍班

七百五十九員 軍功八百四十七員 宗女夫三百
單八員 陣亡女夫六十九員 陣亡恩澤二百五十

三員 武舉四百十五員 后妃親屬一百八十五員
主管進奉二百五十五員 獲賊五十四員 吏職

一千三百二十一員 而使臣之從軍與未參選者不與
進納五百單一員

冗官可知矣

咸平至嘉定侍右員數多寡

今之侍右侍郎即祖宗時判三班院也咸平以前三班
院員止三百或不及天禧後至二千四百餘員熙寧後

至一萬五千六百九十餘員而宗室七百七十餘員不
與焉視天禧之間蓋已五倍矣以出入籍校之熙寧八
年入籍者四百八十有餘其死亡退職者不過二百此
所以歲增而不已也政和官制以秉義郎易東西頭供
奉官忠訓忠翊郎易左右侍禁成忠保義郎易左右班
殿直此以上謂三班其下及有奉職借職則以承節承信郎
易之今侍右名籍至一萬五千六百餘視元豐又增五
分之一蓋三歲一郊奏補至千七百人而其他入流者

不與焉此所以猥并而不可止也

川秦茶馬二司分合

川秦權牧自元豐以來雖各有兩司

秦司權茶秦司買馬川司權茶川司

買馬大抵川秦皆止選一使蓋摘山市駿非相通不可也

紹興初陝西失守李子公為使乃奏合四司為一司以省官吏如是者六十八年矣有吳揔者武順之第四子初補京秩乾道中自都官郎官易帶御器械年三十餘為池州都統制每妄殺人孝宗知之命復易文淳熙中

以敷文閣待制提舉茶馬坐黎州變故降為集英殿修
撰奉祠久之復命出守稍遷寶文閣待制知瀘州慶元
嘉泰之間揔食祠祿居漢中而從子吳曦為殿副二人不
相能揔每丐任使曦數陰沮之揔無以為策時胡直閣
大成為茶馬司盡核諸場額外之茶且損蕃商中馬之
直舊例買馬必四尺四寸以上及大成損馬直而馬至
益希所市四尺一寸而已其至軍中斃者益衆朝廷苦
之揔一日與殿司取馬統制官彭輅謀納賂於蘓師旦

且說之曰馬政積弊如此非西人諳其利病者不能更張莫若復委吳次對師旦然之命下後省駁之乃詔摠與郡朝論方難其選一日輅與師旦語因及之輅自言世西人今西蕃多善馬持茗司損其直故以駕駘入市誠以善價招之當可得師旦喜曰無踰公者矣翌日召輅至韓府平原見之立語少須又翌日遂有分司之命大畧以為茶馬司所發綱馬全不及格積弊極深宜有更革自今差文武臣各一員令三省樞密院條具來上嘉

泰三年八月丁未也後四日遂命直秘閣知瀘州王大
過與輅分領之大過置司成都輅置司興元府方摠之
受堂帖也即以秦司屬官印視事于其宅又以迂吏
稍緩私遣衛前軍二人至成都府捕胥長以來自紹熙
末茶使視事皆申知制司摠以身為從官用故事不復
闕白謝用光怒會得邸吏罷報即追還迂人械所遣二
卒還軍中總大沮然猶得知潼州府云時義烈廟初成摠
身至興元以謁廟為名與曦樂飲結驪而去輅至司所

市馬終不及格則以深蕃道梗難以猝致而為詞焉輅
果之子後為殿嵩

后妃王主奏薦格

渡江後后妃之家奏薦每遇大禮聖節生辰皇太后家
推恩四人皇后二人親王公主諸妃遇大禮各奏二人
昭儀至才人各一名

內命婦誕育推恩格

內命婦誕育皇子女推恩者皇生子生嫡好以上三人美

人才人各二人皇子褻頭出閣妃五人婕妤以上三人
美人才人各二人公主生一品二品二人其餘一名上
頭出降一品四人婕妤以上二人美人才人各一名非
次進封者推恩二人美人才人各一名

嘉定二年楊皇后已正位詔用

奏薦三年十月生皇子特與四名蓋以事體增重故也

宗室封女之制

凡宗室封女之制使相女封淑人節度使碩人觀察使
令人團練使恭人遙郡團練使宜人太將軍安人凡宗

女郡主至安人身亡皆任子孫一人淑人以下未有子
食祿者惟聽任所生子凡郡縣主兩遇郊皆推任子恩
郡主四人縣主一名郡主得奏期以上親縣主止奏子
孫

妃主親王所奏親屬

凡妃主許奏總麻親之子從一品許奏總麻親才人許
奏小功以上親親王婦之有服親及有婦親之夫皆許
奏內命婦非遇大禮雖諸妃親屬止受承印郎

內命婦封贈

凡內命婦封贈妃三代婕妤以上二代美人一一代

職事官改官法

職事官改官法樞密院編修官秘書省正字太學博士
兩學正錄到任寔歷一年通理前任四考並自陳改京
官郎未滿就改一等差遣者湊及一年聽通理勅令所
刪定官有出身四考無出身五考從本所保奏與改合
入官大理寺直評事共職滿二年通歷任五考有改官

舉主三員者亦聽舊法評事改官帶行職任及補外例

得添倅諸州紹熙初沈評事槐始與堂除知縣

二年九月十五

日後又不行慶元末李持直國柄復以近制出宰金壇

五年五月二十三日

自是皆作邑矣開禧末李侍郎說有請乃命

以二年為任說巨野人漢老之子用李季章薦至侍從
今以集英殿修撰知廣州云

舉閣門祗候二事

凡舉閣門祗候之制諸路監司郡守及州縣轄已上許

歲舉所部廉幹有方畧善弓馬經兩任親民無遺闕及
曾歷邊任者一員郡守仍員郎正使或右武郎及帶職
陞朝官以上乃得慶舉淳熙新制也諸舉充閣門祇候
用舉主七人內一員職司侍右試孫吳兵書大義五道
通時務邊防策一道文義稍通二百字以上送馬軍司候弓
馬合格取裁

宗室鎖廳出身轉官例

凡宗室鎖廳得出身者京官進一官選人比類循資無

官應舉得出身者補修職郎即濮秀二王下子孫中進士舉者特更轉一官

選人歷任有負犯者改官增舉考

諸選人改京官歷任嘗有負犯者公罪一犯徒兩犯杖四犯笞並加一考私罪笞亦加一考仍增舉主一員杖以上加二考增舉主二員或職司一員即舉主考第及格而以事論罷者雖降資亦不理逮闕並改次等合入官

進納授官人陞改名田之制

凡進納授官人陞改名田之制歷任六考有舉主四員與移注歷任十考有改官舉主七員與磨勘郎因獲盜應循從事郎以上者具奏降等與使臣其因軍功捕盜得改官酬獎如不願換使臣比類循資至承直郎止

稱軍

功者謂親冒矢石或獲級或傷重及戰退賊衆解圍其運糧守城進築隘郡夫之類郎因軍功捕

盜而轉至陞朝非軍功捕盜而轉至大夫者聽免差科

科配如官戶

吏職補官至從政郎止

凡吏職年滿依法補授將仕郎後有恩賞者許循修職
郎用考第闕陞至從政郎止其不因年勞非泛補授者
未得注擬具元補依奏裁

慶元蔭補新格

慶元蔭補新格使相以下十人執政官太尉八人文官
大中大夫以上及侍御史武臣節度承宣觀察使六人
文臣中散大夫以上武臣防禦團練使及橫行四人文

臣帶職朝郎以上武臣正使三人致仕遺表文臣前宰
相見任三少使相共八人曾任三少使相七人曾任執
政官六人大中大夫以上二人武臣使相已上八人節
度使六人承宣使五人觀察使四人文臣中大夫武臣
防禦使已下並不得推遺表恩先是紹興初中書舍人
趙思誠嘗上任子限員之議詔從官討論中省淳熙九
年八月庚子始用廷臣集議行之既而從之有身前已奏
六人而身後推恩為吏部所格者開禧末議者有請乃

詔致仕遺表恩澤在限員之外若非泛恩澤則並不許
云謂監司帥臣遇覃恩及泛使出疆之類

七色補官人奏薦法

凡非泛補官者舊制員郎以上官皆得任子乾道末始
詔員郎副使以上補授及三十年以上者聽官本宗總
麻以上親一名帶職員郎已上入官十五年正使已上
入官二十年並係親民資序者遇大禮聽蔭補一名止
其致仕郎不在蔭補之限如已任而被任人身亡者俟

致仕日聽蔭子孫一名其大中大夫觀察使已上不拘
此令九年七月詔旨也非泛補官者謂臣僚奏補異姓
總麻已上親及嘗得解人娶宗室女補文資之類

諸縣推法司

舊制諸縣不置推法司吏受賕鬻獄得以自肆紹興間
議者始請萬戶以下縣各置刑案推吏兩名五千戶已
下一名專一承勘公事不許差出及兼他案仍免諸色
科數事件月給視州推吏減三之一委令佐選擇有行

止無過犯諳曉勘鞠人充一年為界即因鞠受財並行

重法

元年七月
庚午勅

然諸縣多不奉行朝廷間之乃勒令請

領重祿如不受者勒停所屬不幫支者從例受制書而

為抵罪

四年二月已
亥都督批狀

慶元初又詔諸縣編錄司亦行重

祿仍令縣主吏舉有行止不犯贓私罪小吏三兩人就

司習學遇闕縣聞州委官試習學人斷案一道刑名五

件取稍通者充及三年檢閱並無差失陞一等名次主

吏有關得先補之著為令

元年五月戊
戌日降勅

自降旨後及今

近二十年矣未嘗有行之者

取士

開禧召試制科

兩臺諫論三秀才

自李仲信後制科無合格者又三十餘年有何致者字子一
永康青城人祖者仲字子固淳熙初嘗為部使者知名士也
致少有才為郡守陳纘嗣功館客纘入為司農丞薦致于劉
仲洪尚書所仲洪亦喜之時李季章為禮部侍郎劉師文為
工部侍郎仲洪率二人以制科薦于朝有旨召試會同薦者

吳郡滕晟東陽杜福遭憂不赴召須服闋並召致躁急欲先得試屢懇季章以為狂笑不顧致更禱纘纘即以仲洪意為蘇師旦言之仇胄不得已於仲洪為降內批如所請後二日權中書舍人易元章繳還致大憾乃以劄子白廟堂謂言詞多取憎疾必觸報罷乞請已降召試指揮且謗元章此時鄧伯允方為侍御史俄而以元章除右司諫伯允先為修注以嘗論謝子肅外補憾之不忘及除御史欲奏奪子肅二子出身元章亦恨致因及之伯允曰司諫始入言路而亟讐一布

衣何示人以不廣不若更論二謝如致事及罷得論之明白相繼求對元章論二謝駁放伯允論致進卷詆誣伊尹罷致亦登侂冑之門伯允無以為罪故摘致進論中言伊尹始行堯舜之道而終為天下開陵犯之端之語以此激之時人謂臺諫共彈三秀才蓋指此也辛未歲致以吳德夫再召鄭景紹正言論之乃勒令歸鄉增修所學焉

易元章以

開禧元年八月十四日對鄭伯允以其月之十九日而對鄭景紹奏以嘉定四年五月二日下

殿試不避親

國朝之制發解進士及省試皆置別頭場以待舉人之避親者自總已上親及大功已上婚姻之家皆牒送惟上殿閣試則雖父兄為試官亦不避蓋以為別試之故也開禧元年檢詳毛憲為考官其子自知以迎合用兵冠多士韓侂冑既敗乃用言者奏奪憲次對而降自知為第五甲末名

孝宗議令輔臣考南省上名試卷而中止

故事南省開院後以上十人試卷修寫成冊進上行之久矣

淳熙辛丑歲上命王仲行尚書知舉鄭少嘉侍郎黃德潤侍
御同知既入院矣或謂鄭黃皆閩人恐有私上乃議令貢院
取三十名前卷子於揭榜前五日付輔臣考校然未出
命也居數日宰相趙溫叔因審其事且言如必欲行則
早令試院知之上曰朕亦有少疑更欲與卿等議之溫
叔覺上意已變即奏云臣等亦深疑之未敢遽奏恐有
避事之嫌陛下既選任知舉三人又令臣等攷校則是三
知舉不足信矣況文有不可知者臣等受恩至重今日固

當盡忠考校但恐此例一開後來宰執有挾者得以容其姦上曰朕亦思之不可開此門姑已之後旬日乃命開院日將上二十人真卷先次進入會仲行策題中有太上皇帝匹馬渡江之語上不樂以諭輔臣時臨安已鏤板行之亟命毀板仲行不自安請外數月出知紹興

淳熙議復四川類省試所減額

省試舊以四十人取一名隆興初建劍宣鼎洪五州進士三舉寔到場者以覃恩免解有旨增省額至百人遂

皆以十七人取一人而四川類省試則十六人取一名
後不復改淳熙十五年范東叔仲藝為右司郎中議以
蜀去天日遠士惟科舉一路非有學校他岐進也且隆
興省額蜀人初不預今乃例減名額非是當復故時留
仲正自成都召還為參知政事意亦主之知政共議曰
上改用十五人取一名有成說矣東叔喜徧為禮曹給
舍臺諫諸人言之亦無異議會宇文子英价以兵部尚
書兼侍讀當夜直上以其蜀人也以所議告之子英不

知其由遽對曰類省十六人視南省已優矣尚何議翌日執政奏其事上曰朕已為宇文价言之毋庸爾諸公乃退盖用東叔之議則類試每舉當增省額七八人子英率意而言遂不可復東叔深以為恨

四川類試榜首恩數差降事始

趙莊叔張安國本末相似

自渡江後四川類試榜首若不赴大對例得兩使職官盖優之也丁卯歲何秘舉道夫為榜首其答蜀人材策歷論蜀人難進易退之節有高視天下而竊策之語時

秦丞相方沮張魏公見而惡之遂降旨類試第一人不赴
殿試賜進士出身者為道夫故也庚午歲張閎學貞甫
為榜首答君臣策極其贊美秦丞相喜諭主司於三名
外處之由是貞甫唱名第四而趙舍人莊叔自七八名
外上親擢為第一人其寔莊叔廷策實甚阿時引趙普
雷德驤故事且有欲誅異議之人之語上第以其首句
君臣父子之間天下真情之所在謂有古文氣也甲戌
歲張舍人安國答策遂有一德大臣之言乃擢第一德

大臣乃辛未歲周然莊叔安國既登第獨不附秦安國
益公試策中語也
幾為所殺由是見重於當時焉

孝宗議權免奏薦及罷特奏名

孝宗初受禪以官冗恩濫思有以革之乃議定制百官
已任子者遇郊恩權免奏薦開賢良科令中外普薦而
罷特奏名手詔左諫議大夫王之望殿中侍御史尹穡
右正言晁公武參酌來上隆興二年七月庚寅也既而
瞻叔言陛下即位未久恩澤未徧此二事關於士大夫

者甚衆望少寬之不已則宜立奏薦限員踰數者許回授罷門客親戚漕司之試止移鄰州如是則省額可減百十人此救弊之策也子止亦乞增損制舉薦員朝官年七十未致仕則住蔭子疏奏乃詔年七十歲人遇郊不許奏子俄又詔未奏者許奏一名逮淳熙九年八月始立奏薦限員其後特奏名又以三人而取一皆畧如上旨然恩濫未大減也必也盡以手詔之策行之官曹其少清乎

特奏名冗濫

特奏名進士舊二人而取一淳熙初議者以為冗濫尤甚請裁節之詔吏部同給舍詳議於是尚書程泰之給事中王仲行舍人陳叔晉等奏乞三人取一人其不入四等人舊許納勅再試今止許一試舊免解人有故不入試者理為一舉今不理舊潛藩五路舉人及久在學校充職事人並陞甲今止陞名奏可六年三月也其後朝廷每有慶需則前後不中選者盡取而官之往往千

數百人充塞仕路遂成熟例不可復減矣

女神童

自置童子科以來未有女童應試者淳熙元年夏女童
林幼玉求試中書後省挑試所誦經書四十三件並通
四月辛酉詔特封儒人

太學生校定新制

京都舊法太學生外舍二千人校定百人內舍三百人
校定三十人仍分優平二等優等再赴舍試又入優等

則徑自學官之恩數與進士第一人等所謂釋褐狀元也若平等則謂之一優一平例得免省直赴殿試其次先免解後免省仍並有陞甲恩例紹興間復興太學有

主權立內舍百人為額歲終校定每十人校一人

十五年二

月二十七日是時外舍千人上舍三十人而已慶元開禧兩

放混補外舍生增至千四百人本監乃乞增內舍生百

二十人為額許之

開禧元年四月二十五日

雷季仲為祭酒又請每

歲校定增為二十二入亦許之

二年正月十三日

旨舊法自外舍

升內舍者雖有校定必公試合格乃許升補蓋私試皆學官自考公試則降敕差官故也嘉定中表和叔掌學政奏乞每歲中取外舍生校最優者一人陞補內舍又從之是陞舍之法愈寬矣

淳熙武舉授官新格

武舉補官舊法榜首保義郎沿江巡檢

不入承節郎沿江邊巡檢縣尉等

第二名以下承節郎沿江巡檢縣尉

不入承信郎等

淳熙二年

始比文士恩數榜首補秉義郎堂除以上或諸軍計議

官第二名保議郎諸路帥司准脩將領

一任四轉忠翊郎不隔磨勘以

比文士改合入官

第四第五名承節郎兵馬監押

二任四轉保義郎不隔磨

勘以比文士脩文林郎

餘人如舊是歲五月有忠訓郎張世奕者

自言武舉出身乞從軍許之七年三月遂立法願從軍

人令樞密院銓量畢依新法補官榜首差三銜或江上

諸軍同正將第二第三名同副將第四名以下同准備

將不願從軍或雖願從軍而其才不應選者並依乾道

八年以前舊法八年四月庚戌又詔武舉人從軍如有

已見利便許赴主帥陳述遇有過犯合加罪責申樞密院取旨蓋不盡用階級之制且使無簪楚之辱也五月丙戌又詔武舉從軍人許先令參部出給例歷仍用六考闕陞資序既有言此徒往往自高不親軍旅九年五月丙子有旨自令職事勤恪者從主帥保奏陞差懈惰者按劾然同將官初無待次即日可上又每二考輒復陞差則非末名之士從軍不十年而同統制矣至於三名以上補轉秉義郎或忠靖郎者或改換文資則遂為

京者恩數與進士第一人等又失之僥倖也其後議者
以為言乃詔武舉人毋得鎖試既又不行然自淳熙以
來武舉人亦未有卓然可稱者



建炎雜記乙集卷十六